

## **Ka hmathlir - Eiruk awm lo Mizoram**

*Corruption and hypocrisy ought not to be inevitable products of democracy, as they undoubtedly are today – Mahatma Gandhi*

Eirukna hi “**corruption**” a ni a, English-Lushai dictionary tam zawk ten an hrilhfiah dan chuan ‘**thamna pek, hleprukna, rukna chhiatna emaw bawlhhawhna**’ ti tein an hrilhfiah hlawm bawk. Eirukna hi chin dan tha lo tak anih avangin eirukna in a hrinchhuah te hi a chhe lehzual a: hnathawh tha lo, hleih neia rorelna, hnathawh tur hmu lo pung nasa, hriselna tha lo, tihbawlhhawhna (pollution), chetsual palhna (accident) te leh a dang tam tak a thlen phah thin. Eirukna tamna ramah chuan vantlang leh mipuiin hotu leh sawrkar mi (official te) zahlohna leh rin lohna an nei hma a, ram hruaitu te leh sawrkar fawng vauntu te ngat phei chu mipuiin sawichhiat mai an awlsam hle. Eirukna tamna ramah chuan ram a thang chak theilo a, hmasawnna a thuanawp duh a, sumdawnna a tlemin ramin bungraw thawn chhuah (export) aiin bungraw chawk luh (import) a ngah zawk avangin sumdawnna inmil lo (trade deficit) a awm thin a, ram economy in a tuar thin.

Heng vang te hian eirukna awm lo Mizoram ka suangtuah thin. Eirukna awm lohna Mizoramah chuan heng te hi kan hmu tam tawh ang. Tu te tan pawh taima taka hna an thawhna leh an hnathawh mil ang zel a hlawh leh malsawmna an dawnna hmun, tu te pawh intluk tlang taka tual an lenna, chhungkua leh ram an hmangaihna, in thliar hranna awm lo khawtlang, hnam hrang hrang leh sakhaw hrang hrang ten in dip miah lo leh in hmangaih tlang taka India Constitution in min duh dan ang taka kan chennna state chu.

*Chutiang dinhmuna kan din hunah chuan duhamna leh rinawmlohma in hmun a chang tawh ngai lovang a, mi taima leh tumruh te chauh an hlawhtlinna hmun a nih tawh dawn avangin sumdawng hlawhtling tak tak te, infiamna lamah pawh nise national leh Asian level mai nilo, Olympics leh World Championships-ah hial India flag fehchhuahpui tur an awm deuh reng tawh ang a, politics ah pawh national politics lama hruaitu ni pha tur an lo chhuak tawh a nga, kan state aiawhtu MP te chu India ram MP ho zingah pawh entawntlak, Parliamentary Committee pawimawh hrang hrangah te pawh Chairman leh hotu a tang thei zel te kan nei tawh ang. Khuanuin sik leh sa, thing leh mau tha ber ber te a thlawnna min pekna hmunah hian nungcha chi tin ten nuam chenin an leng leh a nga, chung te hmuh chak chuan state pawn leh foreign atanga khualzin kan hip luh tam tak ten state economy an tih than awk awk hun tur chu ka nghakhlel tawh tak zet a ni.*

*Mizo hnam hi hnam huaisen leh lehkhathiam thei tak kan nih sa avang te, eirukna leh hleprukna a awm loh avangin kawng engkimah kawng dik leh kawng tha kawhhmuhtu, kaihruaitu tur te kan ngah tawh hle ang a, kan ram educational system leh higher education a that em avangin zirna in tha bik (Institute of Excellence) kan nei nual tawh bawk ang. India Armed Force hrang hrang hoah kan lut nasa ang a, research scientist tha tak tak kan chherchhuak tawh bawk a nga, High Court leh Supreme Court-ah te pawh judge leh ukil tha ber ber te kan nei thei tawh ang. Thiamna, finna, rinawmna, rem hriatna, ram hmangaihna leh huaisenna nasa zawk kan nunna kan sengluh hunah tak tak chuan India rama state hrisel ber, infant mortality rate hniama ber, sex-ratio sanna ber, life expectancy rate sanna ber, hmeichhia leh naupang develop nasatna ber state, kum upa lam leh vohbik te tan pawh an chanvo dik tak an hmuh zat zat na hmun a lo ni tawh a ang. Kan state natural resources kan hman tangkai thiam*

em avangin thil siam leh a dehchhuahna lamah hma kan lo sawn tawh hle a nga, National Stock Exchange, Mumbai-ah leh foreign ah te pawh Mizo company te an in ziak lut (register) chur chur tawh ang. Eirukna a awmloh avangin India state hrang hrang atang tein kan state development dan hrang hrang lo zirchiang turin state sawrkar hrang hrang ten minlo lo zirchiang turin palai an lo in tir lut fo tawh bawk ang.

Heng zawng zawngte hi ka suangtuahna leh hmathlir ka lo neih thin te chu nimahse kawng hi a bumboh thin. Hmasawn tur chuan midang ni lovin mahni (self) hi kan pawimawh ber tih hriat a tha. Eirukna awm tur hian mi pakhat chauh a theih loh avangin mi pakhat aia tam an awm chauhin eirukna leh hlemhletna hi a thleng tlangpui thin. Engpawh nise mimal tin hian eirukna, hlep rukna, thamna leh thil chin dan thalo zawng zawng lakah hian insum fel fai thei vek ila chu eirukna te hi a lo thleng lo tur. **"Mihringin ti theia kan inrin apiang kan ti thei tlangpui thin a. Ti thei lova kan inhriat apiang kan ti thei lo mai thin bawk"**<sup>1</sup>. Ti thei tur anga kan insawi tam tak kan tih theiloh nachhan tam ber chu a laklawhah kan tlawm ta tlat thin a. A tira ti thei tur anga kan insawi kha engemawchen hnuah **"A harsa em mai chuti khati..."** kan ti leh mai thin. Tih theih loh kha kan phak tawk niin kan hria a, chuta tang chiah chuan kan ti thei ta lo mai thin a ni.

Tuna kan khawtlang awmdan te, hmasawnna hnathawh dan te hi kan phak tawk anga kan ngaih a, eirukna awm kan hriat leh hmuh te hi do lo a, eirukna laka in veng bawk chuang lo a, hahdam taka kan awm a, kan lungawipui mai chuan corruption free state lam thuah sawi tur kan nei meuh lo ang. Kawng hrang hrangah kan phak tawk leh kan tih theih te hi hei aia sang niin ka hre thin, mahse Zoram mipui leh kan ram hruaitute hian tuna kan awm ang hi kan phak

tawk niin kan hria em ni chu aw? tih hi ka ngaihtuah deuh zawk mah.

**"Kan ram leh hnam dinhmun hi mut mawh hnar mawha neitu tak takte chuan, pawn lam beitu sual hmanraw hlauhawm tak aimahin, rilru chhungirla min luhkhung tawh zawk tu sual hmanraw huaisar tak tak te hi an vei em em tawh thin a "<sup>2</sup>.** Vei ngut ngut lam a ni lemlo mai thei a, amaherawhchu he sual leh chin dan thalo hi hnawt kianga ti bo tur leh tun aia hmathlir thui zawk nei a, eirukna laka kan lo fihlim vek a pawimawh zia hi kan hriat chian vek hunah kan ramin nasa takin tun ai hian hma a lo sawn deuh deuh a nga, nakina kan tu leh fate tan tun aia ram nuam leh duhawm hi kan hnutchhiah thei zawk ang.

Zawi zawiin kan hmuh lai ngeiin he min run mektu eirukna hi kan rilru, chhungkua, khawtlang, ram leh hnam pawh tichhe thei khawp a natna tha lo tak anga kan pawm a hun tawh hle. Eirukna do na kawngah hian khawvel sawrkar hrang hrang te pawhin hma an lo la nasa tawh hle a, chutiang bawkin kan state sawrkar pawhin nasa takin hma pawh an la mek bawk; Vigilance Department te, Anti-Corruption Buereau te, CBI, RTI Act te leh a dang tam tak te hmangin hma an lo la thin tawh. An ni hian chak takin hma an la a, hmasawnna leh hlawhtlinna tam tak an zarah kan hmu a, a lawmawm hle. An hmalakna tam takah hian mi tam tak chu harhchhuak mek mahse, kawngkal nei taka tih tul chang te pawh awm thin. UN Convention Against Corruption duhdan zulzuiin July, 2018 a Indian Parliament House pahnih ten eirukna ven nana dan **Prevention of Corruption Act, 1988** siam that (ammend) tak te kha a lawmawm hle a, kha kha eirukna ven nan leh hemi section hmansual (misuse) loh nana dan awm sa siam that belhna a ni. Tun aia nasa lehzuala mipui te pawhin kan theihna zawn apiangah anni eirukna do tu department te hi kan thlawp tlat zel a, ram tana tha tur tih hriain

an hnunga kan din tlat zel a la pawimawh deuh deuh dawn a ni. Anni hna thawh tawh en hi chuan an hawk nasa tih loh rual a ni lo, India ram state dangte ang bawkin Mizoram hi eiruk leh hlemhletna kawngah kan fihlim bik lo a, state sawrkar inrelbawlnaah bik phei hi chuan sawrkar sum hmuh 90% dawn hi chu Central sawrkar atanga dawn a nih thu an sawi kan hre thin a, tin hei hi dik tak leh tangkai taka hman a ni lo fo tih kan hre bawk. Mipui leh sawrkar hnathawkte zingah mi fel leh thianghlim tam tak an awm rual hian, dan hriat tawk loh leh dan zawm that tawk lohna avangin miin thil diklo a tih phah fo. Mahni hlawh phu lova in leh lo, thil neih hlut zawng dik tak sawrkar hnena report ngailo (property return) leh report diklo pe thin te pawh sawrkar inrelbawlnaah an awm zeuh zeuh thin. Mizorama sawrkar hnathawk te hi kan state budget atanga hlawh la tam ber an nih avangin anmahni atanga eirukna, thil neih zep rukna, hlemhletna te hi a lo kiam theih nan dik taka a hun taka property return thehlut lo sawrkar hnathawk te chu an ACR leh promotion te thlenga hrek turin dan te hi awm se a tha. Hei hi sawrkar hnathawk te tihtaihna lam ni lovin fimkhur tura in fuih thar nan leh dan zah tura inzirtirna tur atan hman ni ta se a lawmawm ngawt ang.

Engvangin nge Eirukna a lo thlen thin?

Hringnunah hian eirukna leh hlemhletna te hian zung a kaih ngheh em avangin mihring nunphung a zia rang bet tel nghet tlat emaw tih theih a ni. Mi zawng zawng chungah he ze thalo hian zung chu a kaih lo nain hmasang atang tawhin natna benvawn ang maiin mi a man tawh te chu thlah a tum mai mai lo. Khawvel history kan chhiar kir chuan khawi ram, lalram, sawrkar, khawtlang leh mimal nunah te a lo in phum ru ng het em em tawh a ni. Rom lalram tlukchhiat na chhan pawimawh zingah pawh eirukna tho hi a ni a, Rom sawrkara lalber (emperor) thlanna turah pawh khan eirukna, hlemhletna leh

inphiar rukna te tel lo chuan lalber thlan pawh kha a harsa em em. Lalber thlanna kha Senate, Praetorian Guard (lalber vengtu sipai te) leh army (sipai) te kutah khan a awm deuh chawt a ni. Hun lokal zelah lalber thar tur thlannaah Praetorian Guard ho khan thuneihna an ngah ta em em a, nimahsela 186 A.D. alo nih khan sipai te khan lalber thlanna turah thuneihna pum hlum deuhthaw nei tawhin Rom sawrkara lalber (emperor) nihna chu sum a chhang huai ber (highest bidder) hnenah khan an hrалh chhawng ta tawp thin kha a ni. Heng hian hlemhletna leh inphiar rukna te a tih pun belh NASA a, kum 100 a lo ral leh meuh chuan Rom sawrkar chuan emperor 37 lai an nei hman der a, chung zinga 25 te chu tualthah (assassinate) an ni bawk. Heng eirukna tam lutuk avang te khan Rom sawrkar ropui tak ni thin kha a lo kehchhiat phah a ni.

Inthlanna vote lei leh hrалh (electoral corruption) te kha a hluar em em bawk a, historian te chuan an zirchianna atanga an hmuhchhuah chu Julius Caesar a pawh khan Rom sakhuana a puithiam sang ber nihna **Pntifex Maximus** dinhmun kha thamna atanga a hlawhchhuah niin an sawi ve bawk. Rom sawrkar hunlaia philosopher lar tak Seneca-a chuan an sawrkara hlemhletna, eirukna, vote lei leh hrалh hluar em em chu ngaimawhin an hunlaia mi lar Lucilius-a, ziakmi, thu leh hla lama in hmang tak hnenah chuan heti hian lehkha a thawn tih kan hmu bawk. **"Thlan tlin an nih theih nan sum leh pai mai bakah thil hlu te an in pe a, nimahsela thlan tlin an nih meuh chuan a thlang tling tu te erawh an hre duh tawh lo"**<sup>3</sup> tiin. Mithiam tamna hmasang Grik lalram pawh kha eiruknain a lo luhchilh ve tho mai. Thil bul leh thu rin bul chhui mi (philosopher) mithiam Aristotle-a khan Athens khawpuiah ringawt sawrkar hnathawk hlepruk ching mi 20,000 an awm niin a ziak ve bawk. Hmasang China ram pawh eiruknain hmun a lo luah ve thin tho mai, Andras Csuka a chuan heti hian a ziak a, **"Eirukna hi kum China-ah kum sang tam tak atang tawh khan a awm**

*tawh a, kum zabi 19-na a Qing Dynasty a lo tlakchhiat nachhan pawh kha eirukna avang a ni.*"<sup>4</sup> English lal te pawh kha an bang bik chuang lo. Lal John-a khan biakin leh sakhua hmun pawimawh te pawh zah zo lovin a rawk a, Lal Henry VI-na, Lal Charles I-na, Lalnu Mary I-na leh Lal Richard III-na te pawh khan an zavaiin an thunehna hmang sualin mahni tanghma haiin kohhran leh lalram dan te an pawisa zo bik lo a nih kha. Africa khawmualpu a ram rethei ber berte zingah pawh hotu tha lo, eirukna leh hlemhletna a mi hmingchhia tam tak an awm ve bawk. Mahni thu chauh hmanga roreltu (dictator) rothap em em Idriss Deby, Lasana Conte, Paul Kagame, Yoweri Museveni leh midang dang roreltu tha lo tak tak Africa khawmualpuiah khuan an lo awm tawh thin. Peter Gill a chuan "**Ethiopia hotu Meles Zenawi hi mi duhawm leh hlemhle, mahni mi leh sa pawh hmangaihna neilo**"<sup>5</sup> tiin a lo sawi bawk. America rama vaihlo company lar tak pakhatin an company a lo hlawk zawk nan mihringah nghawng thalo a neih theih dan te leh vaihloa tur awm nicotine that loh zia mipui te hnena an puanzar duh lohna te pawh kha tun hnuah chuan eirukna leh hlemhletna case-ah an chang ta a, **Enron** company in company lem tam tak din a mipui bum a an sum laksakna tanga an company executive te sumah an chan tir dan te kha sumdawnna history ah chuan corruption lian ber zingah an tel reng tawh ang. America stockbroker ni thin, **NASDAQ** a non-executive chairman ni hman hial Bernard Madoff-an mi 4,800 vel sum \$64.8 billion vel a tih chingpen sakna **Ponzi Fraud Scheme** te kha khawvel history in a theihngihlh tawh loh tur zinga mi a ni a, khang te kha tun hnai kum sawm liamta vela thil thleng mai kha a la ni. Hun liamta zawng zawng te kha chhui kir chuan hun leh hmun tam zawkah eirukna kha a lo awm tawh tih a hmuh theih. Babulon mite inkaihhruaina dan bu 1754 BC vela mi **Code of Hammurabi** te, Juda tena thu sawm pek **The Ten Commandments** te, Islamic sakhua te dan zawm tur **Koranic Law** ah te

eiru lo tura inzirtirna kha a lo chuang daih tawh hlawm.

Hmasang atang tawhin India ramah pawh hian eirukna leh thamna (bribery) te hian zung a lo kaih thuk tawh hle a. 4 BC hunlai a zirtirtu lar leh Chandragupta Maurya khawnbawl Chanakya (Kautilya tia hriat ni bawk) chuan a lehkhabu **Arthashastra** ah chuan lalram chhunga lal khawnbawl leh hnathawk tu ten sum an tih chingpen dan chi hrang hrang sawmlì chiang takin a ziak a. Chung te chu **pratinbandha** emaw obstruction (hna tibahlah) te, **prayoga** emaw loan (a pung awmna sum puk tir) te, **vyavahara** emaw trading (in dawrna) te, **avastara** emaw fabrication of accounts (account phhuahchawp) te, **pariahapana** emaw causing less revenue (chhiah chawi tlem tir) te leh **upabhoga** emaw embezzling of funds (pawisa eiru) te an ni hlawm niin a lo ziak<sup>6</sup>. Arthashastra lehkhabu atang hian hmasang India ramah eirukna te kan hmuh rual hian, khang hunlai khan dan khauh leh mumal tak eiru, hlepru, thamna la te leh thil dang sual ti te hremna turin dan dang dang a in ziak bawk; sum faia pawisa chawi tir atanga nunna hial laksak theihna dan an lo nei tawh bawk a ni.<sup>7</sup>

AD 5 hunlaia India rama Gupta lal ho pawh khan eirukna veng tur leh do turin **vigilance** an din niin ziaktu thenkhat chuan an ziak ve bawk. Kum zabi 11-na a Kashmiri hla phuah thiam (poet) Kshemendra-a chuan an lal Jayapida hnenah lehkha **Dasavataracaritam** ziakin chutah chuan an lal chu a khawnbawl minister, sipai hotu general, puithiam te leh a hnuaria hnathawk hotu tu te chu eirukna, hleprukna leh thamnaah te an inhnamhnawih nasat avangin ban vek turin a ziak a. Tin, kum zabi 12-na a ziaktu lar tak Kalhana chuan a lehkha **Narmamala** ah an hunlaia India rama eirukna leh hleprukna a nasat avangin hetiang lama mi fihlim te chu lo pen chhuak a, eirukna leh hleprukna do turin a au lawm lawm tih kan hmu. Heng lehkha ziak

pahnih atang ringawt pawh hian India ramah eirukna hi a lo hluar tawh thin tih kan hmu thei.

A chunga mi te atang ringawt pawh khian eirukna hi tunlai thil thar a ni lo tih kan sawi thei a, hun rei tawh tak atang khan hringnunah mi a lo chenchilh tawh a, hringmi te awmna apiang deuh thawah eirukna hnu hma hi chhui tur a awm angin a ngaih theih hial. Eirukna hi mihring chaklohma atang tein a lo in tan ber. Dan lo anga chet duhna te, rilru hrisel lo leh kawiah te, hleih neia rorelna hmunah te, mi mahni hna thawk zo loah te, mahni chanvo leh mawhphurhna hlen zawh lohna hmunah te hian eiruk duhna rilru hi a lo piang awlsam em em a, India rama chanchinbu lar ber pawl **The Hindu** ah chuan Bhabha Atomic Research Centre scientist ni thin Ganapati Ramakrishnan a chuan a thu ziahah "**Dan leh mipui lalna (democracy) inkawp hian kan rama politics bawlhhlawh hi a thianfai thei**" tiin a lo ziak a ni. Hei vang hian kan ram dan hnuia ram rorelnah te, kan hnathawhna leh politics te hi thienghlim takin i khel thin ang u.

Kohhran leh eirukna veng tura a mawhphurhna:

Mizorama Mizote hi kan zavai deuh thaw hian Kristian-a in chhal kan ni. Tin, kohhran hi kan dah sang hle bawk; Kohhrana lawi leh hming ziak lut te phei chu an ni tin hnaa rinawm leh taima bik turah mipui ten kan beisei thin. Nimahsela heti chung pawh hian eirukna hi sawrkar hnathawk, nitin hlawh chawpa ei zawng, zirlai, sumdawng leh eizawnna hmun dang dangah te hian a la awm fo tih chu tlang hriat a ni. Hetianga kan ringtu puiah te rinawm lohna kan hmuh hian amah kha kan beisei angin kan hmu rinawm thei tawh lova, Pathian thu sawitu sawi lo ngaithlatute beisei dan chuan a thusawi ang khan a nitin nunah a tilang turin kan ngai thin a, kan sawi chhe zui ta mai thin. Kohhrana rawngbawltu te chauh lo pawh, kan zavai hian ringtu in ti theuh kan ni a, Kristian kan nih tawh chuan Pathianniah chauh

nilo kartluanin kan hnathawhnaah, zirna inah, sumdawnaah leh thil dang dang tih naah Kohhrana kan rinawm ang thoin rinawm zel ang u. Helai nun tak hi a pawimawh hle, "**Biakin chhung leh a compound a kan rinawm ang hian kan nitin nunah kan rinawm a, kan thinlung a thianghlim a tul**"<sup>8</sup>. Rilru thianghlim loah te hian eirukna hian bu a khuar ng het thin. Kan rin Pathian hi a thianghlim em avangin amah zuitu te pawh amah anga thianghlim turin min duh a, kan rilru leh ngaihtuahna a thianghlim phawt chuan eirukna lakah Zoram ringtu zawng zawng te hi kan fihlim vek a nga, chuvangin kohhran (church denomination) tin te hian Thianghlimna hi kan chawisan a, miui te bula kan sawi uar a, kan nunpui uar deuh deuh theih nan biakina sermon piah lamah seminar leh inzirtirna lam uar ila kan ram hian hma kan sawn pui thei ngei ang.

Thuthlung Hlui hunlai pawh khan Lalpan Mosia a bia a, Lev 19:1-2 "**Israelah thlah mipui zawng zawng chu bia la, an hnenah in thianghlim tur a ni, kei,Lalpa in Pathian hi ka thianghlim si a.**" tiin thu a pek kha. "**Chuvangin keini Thuthlung Thara 'kohhran' te tan pawh thianghlimna hi a pawimawh em em**"<sup>9</sup> Heb 12:14 ah chuan, "**Thianghlimna tel lovin tuman Lalpa an hmu lovang**". a ti hial a.Bible-ah hian thianghlimna thu hi vawi tam tak ziak a ni a, a in ziahna pawimawh zual thenkhat tarlang tai la. Exo 25:8; Lev 11:44-45; Sam 119:9; Rom 12:1-2; II Kor 6:19; Eph 1:4; Kol 1:21 ah te kan hmu, chuvangin mi rilru thianghlim te chu engti kawng mahin eirukna sualah an tlu ngai lovang. Thil dik leh tha kan hria a, nimahsela ringtu te pawh hian kan hriat sa reng thil diklo kan ti fo thin. Chuvangin rinna leh mihringte inlaichin dan hi Marianna Fotaki, Harvard University hnuiaia Edmond J.Safra Center for Ethics a researcher chuan a thawhpuite nena an research paper publish-ah chuan heti hian an zirchhuah chu an ziak a. "**There is a general agreement that religion and ethics are closely linked. Religion provides a system of norms and values guiding how**

*individuals should live. Such norms and values are often codified as religious beliefs in the Bible or the Quran. Even so, behavioural ethics as a discipline tends to ignore issues of faith*<sup>10</sup> tiin. Mizo tawng chuan "Sakhuana leh mihring chanvo leh mawhphurna te chhuichhuahnaah hian hnai takin an pahnih hian inkungkaihna an nei dun tih hi ngaihdan nawlpuia kan neih dan chu a ni a. Sakhuana hian ringtu hlutna leh a nundan tur tehfung a siam sak a, heng mihring nundan tur, inzirtirna leh ringtu nun tehfung hrang hrang te hi Bible emaw Quran ringtu te chuan an hmu a, nimahsela heng nundan tha leh nunphung tha te hi an zawm meuh lo" tiin an zirchhuak a ni. "Ringtute hi Pathianin min rin ngam avangin sual zingah min tlat faltir a, mahse, a rin tlaka awm lovin kan tlu leh mai thin hi a pawi hle"<sup>11</sup>. Kohhran tena kan rin em em leh kan ngaihsan em em Tirhkoh Paula khan Pathianin a rin ngam ve zia sawiin, I Tim 1:13 "**Hmanah sawichhetu leh tiduhdahtu leh sawisatu ni mah ila, rinawma mi ngaiha, a rawngbawltuah mi ruat avang hian**" tiin a sawi a. Pathianin rinawma a ngaih ang ngeiin a thih thlengin rinawma a awm ang khan keini kohhran a awm ringtu inti te pawh hian kan kohhran theuhah Tirhkoh Paula angin rinawm taka nun ve hi kan thih thlenga kan tih tur ani tih kan in zirtir ngun lehzual a ngai.

Khawvela ram tin leh hnam tinte hi khawvel awm tirh ata vawiin thleng hian Pathianin a hre vek a, a hmu reng a ni. Mitin leh hnam tinte hi an thiltih ang zelin an chungah ro a relsak mek a, a relsak zel dawn bawk. Keini Mizote phei hi chu Lalpa hre tawh tu te kan ni a, chumi avang chuan Pathian hi kan chungah a thikthu a chhe hle a ni tih te hi a bik takin kohhran hrang hranga thalai te hian hre thar leh ila, kan chanchinbuah te nasa takin Pathian tihna kawngah fimkhur thar leh turin ziak ila, tun aia nasa hian eirukna leh hlep rukna te hi kan ramah a lo tlem phah ngei ang. Kan ram siamthatna tak tak tur hi chuan kohhran atanga bul tan hi a hlawk hle ang. Kohhranah

eiruk thatlohma leh a pawi zia inzir tirna hi Sande Sikul ah te, Nilai Zan Thupui zir hunah te, Beihrual zirlai buah te, kohhran thalai intawhkhawmna fellowship leh conference-ah te leh programme hrang hrang remchang apiangah nasa lehzuala in zirtirna mumal tha kan neih chuan min runtu hmelma hi kan tu dai thei dawn a, kan in veng thiam dawn bawk a ni. Chuvangin eirukna awm lo Mizoram kan hmathlir mekah hian thui tak hi chu kohhran mawhah hian a innghat tel a ni.

Kohhranin eirukna do na kawngah hmabak kan la ngah

1. Tunlaiah kohhranah hotu leh rawngbawltu chinah te mi fel kan ngah tawh khawp mai, a lawmawm hle. Nimahsela heng mi te karah hian ringtute tih atana mawilo la ti thin ten kohhran hmel an ti bal fo thin. Hotu leh rawngbawltu chin atan chuan mimal ringawt ni loin, anmahni chhungkaw member zawng zawng te tiama khawtlanga hming hliauna neilo chin chhungkua atang te chuahin hotu leh hruaitu tur te hi kohhran mipui te pawh hian thlang tawh ang u. I fir hle ang u.
2. Eng kohhranah pawh lawi ila, hmun thenkhatah mi tu emaw te tan chuan an thil eiruk/hlep ruk na atanga hremna laka pumpelh nan kohhranah sum, bungrua leh services thawh ching an awm zeuh zeuh thin. Heng hi sual an tih atanga fihlim duhna (impunity) khawvel kohhran hrang hranga hluar mek chu a ni. Prof Charles Antwi, Kwame Nkruman University of Science and Technology chuan "**Kohhran tana thawh lawm tam tak pe a an hausakna rinhlelh kai si te ai chuan mi nun ngil leh rethei te hi kohhran hruaitu atan kohhran hrang hrang te hian hmang tawh rawh se**". tiin a ziak hial a ni. Chuvangin kohhran hrang hranga mipui te hian sum lakluh lama mi thianghlim (clean) nih tum zel ang u.

3. Sum leh pai eirukna piah lamah, thil chin dan thalo (corrupt practices) te hian kohhran a ti chhe mek. Bible in a phal loh neih in ang kawp ching te kohhran hotu leh puithiama ruat chungchangah khawvel kohhran hrang hrang ten an ching tan a, tininneih, in thenna dan (in ma) chungchangah te pawh Biblein min kawhhmuh ang tak zelin che ila, hmeichhe rawngbawltu te phei chu Bible in neih a phal loh angin rawngbawltu/puithiam chin atan nei lo ngam ang u. Tin, tun hnaiah Supreme Court in uirena (adultery) chu suala in puh (offence) atan a tling lo tiin September khan thuchhuah a siam tak te kha kan tan chuan thil hlauhawm tak a ni thei. IPC Section 497 leh Section 198(2) te hi Mizorama Kristian chhungkua te hi a thalo zawngin min sawinghing ang tih a hlauhawm khawp mai.

NGO te mawhpfurhna:

Mizo thalai leh puitling te hi kan zavai deuh thaw hian tlawnmgai pawl NGO ah member kan ni deuh vek ti ila kan sawi sual tam lovang. 2017 a chhuak, **Mizoram Statistical Handbook 2016**, Directorate of Economics & Statistics: Gov't of Mizoram in a tarlan dan chuan Mizoram chhunga NGO hrang hrang ah te hian membership fee pe mi 7,90,554 lai an awm a ni. Eirukna hi naupang leh kum upa/tar hoah te a thlen vakloh avangin thalai leh puitling te hi eirukna veng tur leh do turin kan pawimawh ber awm e. "**Eiruk hi lo thleng ngei ngei tur a nilo, a lo ven lawk theih. Thil dik leh tha inkawhhmuh leh chawisan a, kalphung tha neih a ngai.**"<sup>12</sup> NGO te hi kan state ah chuan sawrkar dawta thil tithei ber leh hnam ang pawha Mizo ten a thinlung taka kan chhuan leh kan hmangaih te chu an ni. Mizoram history kan chhuikir chuan NGO hrang hrang ten ram leh hnam chhan nan te, ven nan te, remna leh muanna a lo thlen nan te, zirna leh hriselna

kawngah te, tanpui ngai leh chhawmdawl ngai te an tanpuina kawngah NASA takin hma an lo la tawh thin a, chu zemawi meichher mawi tak chu mit miah lovin vawiini thleng hian an la chhawm nung zel a. Hei bakah NGO hrang hrang te pawhin kumpuan atan eirukna do kum hial te pawh an lo puang tawh tih kan hria, hetiang kawngah hian PRISM, SOSA, FOMTU leh FLAM te pawh khan eirukna do kawngah tha thawh NASA pawl an ni ngei bawk ang. Heti taka Mizote leh Mizoram tana an pawimawh avang hian corruption free state kan nih theih nan hnuhma lian tak (influence) NGO te hi an ni thei a ni.

1. Role model, Hero leh value system tha ngaihsan thalai ten an mamawh: Tuna thalai te hi naktuk maia ram hruaitu leh mipui tur te kan nih avangin vawiini a kan rilru sukthlek te hi thui takin naktuk a Mizoram dinhmun tur kan ni. Pathian tihna, rem hriatna fel leh kawng dik kawhhmuh kan nih chuan kan state hmathlir hi a eng dawn hle. Chutihlaiin thalai te tan kan ngaihhlut tur leh kan ngaihsan tur dik kawhhmuh kan ngai, rorelna diklo, sakhuana a in kaihruaina dik lo, entawn tur dik lo kan hmuh reng chuan rilru fim tak pu mek te hian kawng diklo kan zawh thei. Chuvangin Mizo te zingah thalai ten nih ve an chak, an ngaihsan tur dik tak, nundan (lifestyle) entawn tur mi dik leh tha, Zirna lama mi thiam, infiamna lama mi hmingtha, mahni chauh pawh a intodelh thei te bakah mi harsa te pawh tanpui thei tura mi hlawhtling, state mai bakah India ram ti hmingtha tu mi chhuanzawm tam zawk kan neih a ngai. Heng te hi tam lehzuala kan neih chuan, thalai ten heng mi chhuanawm tak tak te tih theih ang hi tih an chak ve a nga, a tha zawngin an nunah kan hnam pui ngei te chu an role model/hero an lo ni ang a, rilru put hmang dik nen ram leh hnam kan humhalhin eirukna chak na leh eiruk duhna rilru hi thalai teah a lo piang thei ngai lo ang. Hetiang a mi chhuanawm

tak tak te hi veng tin/khaw tin deuh thawah hian an in phum ru a, chung te chu NGO te hian zawng chhuakin anmahni thil lo paltlang dan te an thalai pui te hnenah sawichhuah tir na hun remchang te buatsaih sak thei se, an chanchin vengchhung chanchinbuah te a tam thei ang ber chhuah ni thin bawk se, NGO anga lawmpuina tam tham kan hlan chuan naupang te teah te pawh role model/hero dik tak tur kan in kawhhmuh lawk thei bawk ang.

2. Taimak lehzual: Mizo te hi hnam taima leh huaisen, intodelh duh tlat hnam kan thlahtute atang tawhin kan ni a. Tunlaiah mi thatchhia leh pamham deuhte lo awm ve thin zeuh bawk mahse hnam taima tak chu kan la ni zel. Awlsam te a hlawhtlinna leh hausakna um tu ten eirukna leh eiruk duhna rilru an pu darh zel bawk a, hei vang hian awlsam tea hlawhtlinna (short cut to success) hi a tlo loh zia NGO te hian an member te theuhah fuih tam se, tin hetiang thil diklo leh thalo ti, Court leh sawrkarin a finfiah ngei te phei chu NGO member atanga ban a, an chhungkua te pawh khawtlangin en san ti tih deuh a an awm theih nan hma lak ni thin se. Hei hian thalai leh mipuiah thil diklo tih duhlohma (resentment) lian tak a tuh a nga, Mizo nun zemawi tak kan vawn nun chung pah hian kawng dik leh tha kan in kawhhmuh zel dawn hi a lo ni.
3. Zonun zemawi chawi nung zel: Kan pi leh pu te khan nasa taka hna thawkin Mizo nun an nunpui a, nundan leh kalphung chu hnam dang tihdan la loin lungawi takin an nunpui mai a, chungte chu tlawnmgaihna te, rinawmna te, taimakna leh chan tawk a lungawi thiamna te an ni. Tunah chuan mi thenkhat te chuan kan chhehvela hnam dang leh tuipui rala hnam thenkhat tih dan te, an inchei dan leh awm dan ang la chhawngin Mizo nun an hnualsuat titih mai thin. Hei hian hnam dang lifestyle

awh ve nate, duhawmna tha lo te leh awhna tha lo dang dang a lo irh chhuah phah a ni. Mizo nihna kam pian chhuah pui a, Mizo nihna bawk kan put liam a ngai. Chuvangin Mizo nunah hian chiang tura kan in zirtir ngun lehzual a, hetiang kawngah hian Zoram chhunga NGO hrang hrang te hian chak leh zualin hma thar, tih dan thar leh remchang zawkin hma han la leh se.

4. Social Media hman thiam: Tunlaiah chuan eizawnna kawng hrang hrang a ni emaw, sumdawnna leh politics te pawh nise, social media hi hmanrua (tool) chak tak a ni. A hmang thiam thiam te vanneihna khawvel a ni lek lek tawh. NGO hrang hrang te hian social media **Facebook**, **Instagram**, **YouTube**, website, email hmang te hian official page, account, channel etc te hi ngah se, active takin heng media te hi update bawk se. Chungah chuan zirlai, thalai leh mipui te hi a khat tawkin eirukna leh hlemhletna laka in ven dan te, a thatlohna leh dan bawhchhiatna hrem theih dan te inzirtir nan heng social media platform te hi tun aia nasa lehzual a an hman chuan kan state chhunga mi te hi anti-corruption campaign kawngah hian kan in hrilh hriat (sensitise) lehzual thei ang. Tin. social media thatna em em chu a hman man a tlawm em em a, a darkh zauin a darkh chak si a, chuvangin heng NGO hrang hrang te hian hlawh neia chhawr (paid workers) an neih te hi social media hrang hrang admin nih tir se kan tangkaipui lehzual ngei ang.
5. Eirukna do bil tlawmngai pawl NGO tam zawk kan mamawh: Eirukna do tur bil liau liau NGO hi din belh ni se kan va sawtpui dawn tak em! Chu NGO chu mi in phal te angin thawh lawm emaw, hna an thawh chak lehzual nan mimal, vantlang, kohhran leh sawrkar atanga tanpuina leh thawh lawm awm thei ang ang tur dap sak ni thin bawk se eirukna lakah hian nasa lehzualin kan ram hi a lo fel fai lehzual ang.

Community leh Eirukna:

**Community** hi J.F. Laldailova English-Lushai dictionary chuan **vantlang, khawtlang, chi khata mite** tiin a in ziak a. Eng ang hawi zawng pawhin he thumal hi letlling ve pawh ni ila community siamtu hmasa ber (base) chu chhungkua hi a ni. Kan rama harsatna hrang hrang te hi nuaibo tumin theihtawp chhuahin kan in hria, retheihna emaw, politics dik lo emaw, ruihhlo emaw eirukna pawh nise kan ram harsatna hrang hrang zir a siamthat tuma beitute reng rengin a tawpa kan ram harsatna tobul leh a tihdamna bul nia an hriat chu '**Chhungkua'** hi a ni zel. Kan rama sualna leh harsatna hrang hrang te hi chhungkaw fuh lo atanga lo chhuak an ni a, a tihdamna pawh chhungkuah bawk a awm ani tih hi kan pawm a ngai. Eirukna chungchangah pawh hian kawng hrang hrangin bei mah ila a pawimawh ber chu chhungkua a lo ni tho mai. Chhungkaw tha neih hi sual leh thil tha lo laka himna kulhpui chu a lo ni.

1. Inremchen in zirtir uar leh mamawh tih tlem: Mizorama Missionary lokal hmasa Zosaphluia khan a lehkhabuah intlahrung takin Mizo te chanchin heti hian a ziak a "**An nunze tha lo tak pakhat chu an khawsak inrenchem loh leh tlakran hi a ni. Engmah neih nei lo leh tam tuar fo thin chutianga an khawsa chu a awm lo hle**"<sup>13</sup> tiin kan chungchang a ziak kan hmu thei. Hetianga kan hnam chiang taka min hmuh atang hian 2018 thleng hian Mizote hi inrenchem kan la thiam lo em em hi, duh leh mamawh kan in siam tam thin em avangin (hemi finfiah turin research chu awmlo mahse) eirukna te hian kan nunah bu a lo khuar mai thin niin a lang. Intodelh nana hmanraw tha ber pakhat chu mamawh tih tlem hi a ni a, kan duh em em, neih kan chak em em te hi kan mamawh ber te an nih loh thin avang leh heng thil chuangtlai awhna hian mi chaklo te chu eiruk

*duhnaah a hnuk lut thin. Hemi veng tur hian zirlai naupang te zirlai buah Mizoram SCERT pawh hian nasa lehzuala nunchang khalh ngil thei (moral reformation) lam in zirtirna (lesson) te hi telh tam thei se kan hlawkpui ngawt ang.*

2. Chet hautak loh in tih hmuh: *Chhungkua leh in thenawm khawveng na kawngah pawh ni se, mahni sum dinhmun pawhin a zirloh chung chung pawh a thil tih hautak, hlawkna hmuh letna sawi tur awm mang lo te hi kan sim a ngai. Phuahchawp chaweikhawm, pianchap lawm, jubilee tih ang renga sum leh hun tam tak kan luan ral tir thin hi a uihawm. Tin, inkhawmpui leh thil danga '**ruai leh a behbawm**' siam kan chin te hi thawhchhuah tlem state tan chuan a uihawm em em a, sum nei deuh tur leh thawh lawm thawh harsat lo tura kan dah te '**tlawmngaih chhuaha thawh turin**' kan dil a, heng mi thenkhat te hian sum leh pai an thawh te hmuh let leh nan hleprukna leh eirukna kawng zawh ta te pawh sawi tur an awm niin a hrezawk ten an sawi thin.*
3. *Information Technology hmangin mipui te tan dan langtlang, in hawng zau leh awlsam siam: Eirukna dona kawnga ram hlawhtling ber ber te hian an ramah dan langtlang leh hriathiam awlsam, mi zawng zawng huap zo bakah thil diklo awm apiang thuneitu hrilh hriat zung zung theihna tur an nei vek. Maldives ramah chuan SMS hmangin thil diklo report chu official report-ah an pawm, a report tu chu tupawh nise. Chuvangin kan ramah pawh hian mipui ten thil diklo kan report zung zung theih nan web portal (user friendly) tak nei ve ila, tun ai hian sual hi kan nawr bet nasa tawh ang.*
4. *Mipui ten Eirukna Report Card ziak ve thei ila: Mipui te hnena hna thawh theihna (empowerment) pek hi eirukna vengtu leh do tu tha taka ni thei. Sawrkar hmalakna hrang hrang (public*

services) ah te, contract in duhsakna thilah te, hna lakna chungchangah te hian mipui ten kan sawi duh sawi tir ve nana hmalakna kawng Report Card hi a khat tawkin lak nise, chung te chu hnathawktu tu emaw bik ten chingfel (compile) se, chumi result chu puang zarin eirukna lakah kan khawtlang hi a lo thienghlim lehzual ang.

5. Anti-curroption Club din: Khawtlang emaw biakin emaw, zirna in hrang hrang khawtlang in thenawm khavennaah te, Sande Sikul ah te, High sikul atanga University thlengin zirna inah Anti-Corruption Club din theih ni se, chung te chuan lemchan (drama& theatre arts) hmang te, inhnialfiamna (debate) hmang te, lemziak (cartoon leh poster) hmanga te, anti-corruption camping hmang te, thuziak (pledge) leh thil dang dang hmangin eirukna veng turin hma la se, kan ram hmabak chu a va eng dawn em.
6. Rilru hrisel (mental health) lama hmasawnna a ngai: Mizorama khaw thenkhat Tlangmawi, Riangtlei, Pamchhung, Vangtlang leh Rabung khua te chu 'BPL awmlohna khua' an ni a. Tin, Khawzawl RD Block-ah 5.06% chauh BPL chhungkua awm ang an ni mek bawk. Hetiang anga rilru hrisel leh puthmang dik hi kan khawtlang theuh hian kan mamawh nasa. Kristianna leh Mizo nun zemawi nen a in hmeh ngawih ngawih chu a ni. Chuvangin van Deuzen a thil zirchhuah "**Rilru hrisel awm tamna khawtlangah eirukna a tlem bik**"<sup>14</sup> a tih hi a lo dik em em a ni.

Eirukna hi thil chin dan tha lo a nih mai piah lamah thil chin dawklakah a chang thei a, tu te pawh hi eiru thei dinhmuna kan din theih avangin eirukna ven dan leh a tih rem nana hma lak theih te han sawi belh ta ila.

*Eiruk awm lo Mizoram a lo thlen nan leh a tak ram thleng turin ka hmathlir thenkhat la awm te. Kan sawrkar hi tlemin han tang belh hret se la, hetiangin:*

1. Sawrkarin a hnathawkte hlawh a hun taka pek leh hlawh sang tha pangai tak pek: Sawrkar hnathawk tam tak IV Grade atang a chung lam thleng hian eiru thin an awmna chhan tam tak chu a hun takah hlawh pek an nih loh vang te, khawsak man to zelah an hlawhin an chhungkaw chawm nan an hlawh a beitham deuh avang te hian a eiruk duhna anmahniah a lo awm hma thin. Hei vang te leh chhan dang dang avang tein awlsam leh nuamsa takin eiru thei dinhmunan lo din chiah khan anmahni pawn an thil tih duh chiah loh thil kha an lo ti ta thin a ni. Chuvangin sawrkar hian a hun takah a hnuia hna thawk zawng zawng te hi a hunah tak an hlawh hi pe nghal zat zat thin se, tin an thiamna (skill) in a phu a nih chuan tlema tam deuh hlek a a hnuia hnathawk te hi ruai thin se eirukna hi kan ven hneh bakah eiru tur tam tak kan dang thei ang.
2. Hnathawktu hnianghnar tak sawrkar in a neihin eirukna kan veng thei ang: Hna thawh tur tam si, hnathawktu tlem bawk si avangin hmun thenkhatah chuan eirukna te a lo thleng thin. Hetiang a nih avang hian hna thawh a chaklo thin a, hemi avang te hian hna thawh zawh tir thuai thuai duhna avangin eirukna leh hlemhletna a lo thleng thin a ni.
3. Eiruknaa do turin dan tha: Hemi atan hian kan state chhunga Central sawrkar leh state sawrkar hnathawk te veng turin kan ramah Lokayukta (Central sawrkar hnathawk te tan Lokpal) kan neih vat a ngai. Tum thenkhatah chuan hlemhletnaa inhnamhnawih te finfiah an nihin, hun reilote chhung hrem an

*ni thin. Hetah hian tawp mai loin, service-a an lokir leh hunah pawh hamthatna an dawn tawh te pawh lakkak leh hun lo la kal tura hamthatna an dawn tur thlengin na zawka hrek beh ni se, tin hetiang ti tawh man te chu an fa te thlengin sawrkar hna reng rengah an luh theih loh nan dan chak tak nei ta bawk ila tun ai hian eirukna hi kan ramah a tlem ngawt ang. Hetianga kan tih theih chuan sawrkar hnathawkin eiruk hi an hlau em em tawh ang. Tin, Chief Vigilance Commisioner hi Central Lokayukta ni se, Lokpal hrang hrang ten en in thlun zawmin a hnuaih officer leh hnathawktu tam zawk sawrkarin pe bawk se. Transparency International in eirukna hluar leh hluar loh na ram hrang hrang te a zir chiang thin a, chumi result chu **Transparency Perception Index**-a ni. 2017 index thar berah chuan eirukna awm tlemla ber ram te chu New Zealand, Denmark, Finland leh Norway te an ni a, heng ramah te hian corruption a thlen loh nan leh corruption do turin dan an neih that vang a tih theih. Dan nei tha lo ram South Sudan, Somalia, Eastern Europe leh Central Asia te chu he index ah hian an hniam hle. Chuvangin dan neih that hmasak hi a pawimawh hle.*

4. Sawrkar pisa ah engtik lai pawhin CCTV/ video camera 24X7 hman: Bank hoin an ATM khawl awmna apiangah an khawl veng turin camera an dah thei a nih chuan sawrkar pawhin a pisa in tinah eng tik lai pawha hna thawk thei turin a tam thei ang ber CCTV leh video camera hi dah ve thei se, sawrkar hnathawk intlah dah leh intlah dul an vang ngawt ang. Sawrkar hnathawk tam tak an eiruk thin na chhan leh hnathawhna hmuna an zelthel thin nachhan chu anmahni hmu theitu an tlem vang hi a ni. Tin, sawrkar hnathawk te zingah

*hunbi an vawn dik lehzualna turin bio-metric attendance system dah vek ni bawk se, hei hian hun vawn diknaah te, intlahdulnaah te nasa takin sawrkar hnathawk te a vengin thil diklo ti lo turin a veng thei dawn a ni.*

5. *Hnathawhna hmunah hnathawh tur target siam: Hei hi hun vawn dik nan leh hnathawh tam nan a pawimawh ang. Hnathawk tu kha hna tan hunah hna tanin, ban hun dik takah bang thin mahse a hna a tlem viau chuan ramin hma a sawn thei lo ang. Chuvangin sawrkar pisa tina hotu te hi sawrkarin thuneihna sang pein, an hnuia hnathawkte chu an nitin hnathawh tur bitlhiah diat diat ta se, sawrkar mai bakah kan ramin hei ai hian nasa lehzualin hma a sawn ngei ang.*
6. *Media thianghlim: Media leh Press mi te hi democracy tha taka function tur chuan an pawimawh hle. Nimahsela tunlaiah Media/Press mi te hian politics lama sangaizawnpui an ngah ta lutuk hi ram kalsiamah thu dik leh lai haichhuahnaah harsatna an thlen thei. Political party tan lam neih te, reporter thenkhat ten scam/corruption an hmuhchhuah leh hailan, puangzar si loa an thup bo a, an umzui duhloh anih chuan na taka hrem ni se. Tin, an hnathawhna (career) atana hamthatna sawrkar atanga an dawn theih te chu tih tawp theihna thlengin dan khauh taka wm se, tan bik neilo (neutral) takin kan Media leh Press te hian tun ai hian hna an thawk thei lehzual ngei a nga, mi diklo leh thil diklo tih tum te pawh kan ramah an tlem phah sawt bawk ang.*
7. *Sawrkar hna lak reng reng finfiah leh lepse theih nise: Sawrkar hna thar lak (selection procedures) reng reng te hi a zavaia finfiah leh lepse ngam ni se tun ai hian sawrkar hnathawk tha*

kan ngah phah ngei ang. Hna sang leh hlawh tam mai niloin, IV Grade leh Officer hnuai lam chin te phei hi chu sawrkar kut ke tak tak an nih vang leh a tam ber an nih avang hian hna lak te hi a lo langtlang theih zawk nan dan thar leh khauh zawk kan mamawh. Tin, tunlaiah thangthar zawk te hi chuan Information Technology-ah kan sang tawh a, hei vang hian engkim hna dil leh exam pawh hi online hmanga tih ni tawh se, hei hian NASA takin lehkhapuan hman tur a veng a nga, hnathawh tur a tih tlem bakah NASA takin sawrkarin sum a hup bet thei dawn ani. Tin, heng bakah te hian hmun pawimawh zual ministries/department/bank/public undertaking hmunah te hian anti-corruption leh vigilance lama check turin ruahmanna thar leh chak zawk awm thei bawk se. Tunah phei chuan Supreme Court proceedings te pawh video record vek ani tawh dawn a, hei hi a tha hle mai.

8. Thil man (Inflation) hniam taka dah reng: Hei hi eirukna leh hlemhletna thlen tam nachhan ber zinga mi a ni awm e. Thil man sang avangin miin khawsak rel harsa an ti a, an thla tin hlawhin a daih lo phah thin. Sumdawngte bakah in luah tur nei te hian an duh duh a thil man an tihsan (authority over price control) loh nan sawrkarin mipui te a chhan tur a ni. Quality check leh a enfiahna (monitoring) lam chawl miah loin uluk takin veng reng se thil man te hian san lam an pan mai mai lovang.
9. Nasa lehzuala banking transaction uar tur a hmalak ni se: Sumfaia in dawrna apiangah eirukna a tam duh avangin sawrkar hnena chhiah chi hrang hrang pek turah te reng reng online transaction hi hman vek ni ta se, ramin chhiah pe tura

*hun hlu tak kan khawhralna a lo kiam a nga, tin suma in dawrna (transaction) reng reng hnu chhui pawh a awlsam phah zawk bawk ang. Hei hian NASA takin hlemhletna ti tur te a veng thei dawn a ni.*

10. Thubuai remna tur Court leh Judge tam zawk neih: Misual te hremna turin Court hearing hun chhung hi a rei duh hle. Hei hi a chhan langsar tak chu Court leh Judge kan ngah tawk loh vang a ni thei. Sawrkar hian thubuai a chinfel zung zung theih nan hmun tam thei ang berah thuremna tur leh thuremtu Court leh Judge te siam belh a lak belh ni se. Tin, a theih phei chuan Fast-track Court te ngah phei ila chu kan ramah hian thubuai an rem zung zung a nga, tun ai hian kan ramah hlemhletna leh eirukna te a tlem phah ngei ang.

11. Eiruk dona dan leh chhuina training huapzo taka neih ngun: Zoram khua leh tui ten kan zavai hian eirukna leh a kaihhnawih chi hrang hrang; eiruk that loh dan te, a hrem theihna dan te leh a ven dan tam zawk hi in zirtirna buatsaih ni se. TV, Radio leh chanchinbuah te tun aia NASA lehzual hian hetiang lama hun hman leh thu ziak te hi uar deuh deuh thei se. Hetiang hunah hian a bikin sawrkar hnna thuneihna hman sual chungchang te, mahni hlawh phu lova in leh lo din, sum leh pai ngah leh thamna lak that loh zia in zirtirna hun hman ni thei se.

**'Rim takin zankhuain kan bei tawh'** tih ang khan eirukna hi kan do ho NASA hle tawh a, kan thawh hona hi a sawt lo tih mai a awl viau, mahse heti tak hian bei lo phei ila chu kan Zoram hi a chhe thui tawh viau ang. Heti khawpa thawk chung hian '**mahse**' a awm tlat.

**"Mahse kan ramah eirukna hian ziaawm lam aiin pun lehzual lam a**

**pan niin a lang tlat**"te pawh kan ti thin. Nasa taka sawrkar thuneitu te leh mipui te hian kan bei chung pawhin heti hi kan dinhmun a nih si chuan eiruk dona leh a venna lam hi kan bansen tawh mai dawn em ni ang? Beidawnna hi hlawhchhamna kawngkapui a ni a, hlawhchham i duh chuan i bei tidawng rawh. Mi beidawng te hian chhuanlam tha tak tak chu an nei vek asin! Heti khawp hian eirukna hi do lo ni tawh thinin emaw kawng hran dapin tihdan dang pawhin ti leh mah ila, kan hlawhtling tak tak chuang lovang han tih hi chuan a awm viau zel. Mahse engkawngah pawh hlawhtling tur chuan beidawnna turah pawh beidawn loh a ngai thin. "**Zankhuain rim takin len kan deng tawh a, kan hlawhchham tawh a, mahse i thuin kan deng leh a nge**" tih ang khan, beiseina thar leh hmathlir thar nena hma kan lak zel chuan eirukna nena kan indonaah hian a chak zawkah kan la tang dawn a ni.

Thulakna te:

1. PL Liandinga, "**Kan phak tawk**"
2. Rev. Rosiamliana Tochhawng, "**Chhungkaw Tha Himna Kulhpui**"
3. Lisa Hill, "**Conceptions of Corruption in Ancient Rome and Grecce**".
4. Andras Csuka, "**Long history of corruption in China**".
5. Peter Gill, "**Famine and Foreigners: Ethiopia Since Live Aid.**"
6. Kamal Kishore Mishra, "**Police Administration in Ancient India.**"
7. **The Kautiliya Arthashastra**
8. Rev.K.Lungmuana, "**Politics leh Moral Reform**".
9. Rev.R.Sangthanga, "**Ringtu Chhungkua**"

10. Marianna Fotaki, Faisal Alshehri and Saleema Kauser, "**Can Religion Help in the Fight against Corruption? Evidence from Marketing and Management in Saudi Arabia: A Behavioral Ethics Perspective**"
11. Rev Vanlalzuata, "**Pathian laka rinawmna**"
12. Connor Wernecke, Emma Spell, Joy Schaeffer, Aleksandra Czulak, Fellipe Baskas, Timothy Biyela, Tiffany Cromwell, Zachary Chase, "**Institutional Corruption**".
13. Rev David E. Jones, "**Kum 30 lai rawng ka bawlna- Mizoramah chatuan khua a var ta**"
14. van Deurzen, "**And justice for all: Examining corruption as a contextual source of mental illness**".